

Knurrhahn

Mien Süster Ulla, se wohnt in Walle, hett mi körtens ´n wahr Geschicht vertellt.

Monika geiht geern up Jagd, aber noch lever is se mit hör lüttje Boot unnerwegens un fisket. Dat geiht hör neet um de Taal van Fissen de se fangt, nee, se mag dat geern, heel fröh tüsken Dag un Dau alleen up Water toe wesen, wor hör keen Minske stört. Se is neet an `t Water geboren, sünnern midden in Oostfreesland, in Brockzetel bi Auerk. Dor wohnt se ok noch vandaag bi hör Moeder. De freeit sük immer, wenn Monika in d` Winter `n paar Hasen, Fasanen of Kaninen van d´ Drievjagd mitbrengt. Un se is stolt, dat hör Monika so ´n goed Jägerin is.

Un se is ok blied, dat hör Wicht van ´t Fischen faak Aal, Stint, Butt of anner Fiß mitbrengt. De worden dann van hör alltied heel frisk braadt up d` Tafel brocht.

Annerlesdens is Monika heel up Tied ut Huus gahn. Hör Moeder wuss neet, of se nu Fischen of up Jagd gahn was. As se laat an Vörmiddag weer na Huus kummt, seggt se heel stolt an hör Moeder:

"Vandaag hebb `k Glück hat. Dat passeert neet elke Dag. Hebb sogar ´n Knurrhahn kregen."

"Dat is ja winnerbaar, Monika. ´n Knurrhahn! De hebb `k noch noit sehn. Man vertell, wor hest du de dann skoten?"

De goed Frau wuß neet, dat ´n Knurrhahn ´n Fisk is, de ok in Eems un Dullert vörkummt.

Hunnschiet

Um dat gliek vörweg toe seggen, ik bün ´n Deerfründ, mag ok Hunnen, ofwall mi as Kind so `n lüttje, swart Veerbener in `t Achterenn beten hett. De Gemeenschwester in Widdelswehr hett mi domaals de Stee mit Jod

inpinselt. Dat dee noch mehr sehr as de Beet van de lüttje Köter.

Siet disse Tied hebb ik de Angst vör Hunnen noit heel ofleggen kunnt. Se kummt immer weer, wenn ik alleen dör de Hammerk of over d` Emders Wall loop of mit Rad fahr, un so ´n groot Kaliber van Hund luud blaffend alleen up mi daal kummt. Dann kummt de Bieteree ut mien Kinnertied weer in mien Memoorje hoog. Hopentlick ruckt de mien Angstsweet neet, denk ik dann, bevör dat Heerchen of Frauchen frünnelk mit de Lien winkend luud röppt: "Keen Angst, de deit nix".

In sükse Oogenblicken stiggt de Wut in mi hoog, neet up de Hund, sünnern up de, de sük de Hund anskafft hemmen.

De Dülligheid up Hunnbesitters stiggt bi mi besünners dann, wenn ik sömmers de Rasen an d` Kant van uns Straat maihen much. Bevör ik overhoopt mit dat Maihen up dat mehr as 50 m lang Stück anfangen kann, mutt ik eerstmaal mit ´n Schüpp ´n stückofwat Bündsels van Hunnschiet, de sük in d` Loop van de Tied dor ansammelt hemmen, weg maken.

Skaa, dat ik de Minsken neet toe packen krieg, de hör Hund jüst up dat Stück, dat maken laten, wat ´n Hund ja nu maal - minnestens eenmal an Dag - maken mutt. Meestens komen se mit hör Deer tüsken Dag und Dau of savends heel laat. Wenn ik maal upduuk, dann lopen se gau mit hör Hund an de anner Kant van d` Straat, so dat ik hör nix nawiesen kann. Un ik will ja ok keen Skandaal maken, wenn `t neet stimmen sull, ofwall ik een van de Nahbers in Verdacht hebb.

Villicht würr ja ok helpen, denk ik, dat nettso toe maken, as se dat bi mi doen. Man ik hebb gaar keen Hund

Paar Sluren

Knecht Joke ut Petjem harr bither alltied blot Klumpen of Stefels an hat. Nu sull de ollste Burenjung kunfermeert worden, un de Buur seggt an Joke: "Ik will, dat du up Jung sien Kunfermation ennelk maal ´n Paar richtige Skoe antreckst. Hier hest Geld, fahr mit Dykmann mörgenfröh na Emden un koop di welke.

So maakt he dat ok. Joke geiht in dat moi Skoegeskäft in d` Neutorstraat un lett sük stückofwat Skoe wiesen. Een Paar gefallt hum heel best. "Goed," seggt de Verkoper, de ok de Besitter is, "dann trecken s´ man hör Stefels ut. Wi probeern ehm, of de ok passen."

As Joke sien Stefels uttreckt, fallt de Verkoper bold up Rügg, so stinken de Foeten. Dat is neet uttoehollen.

"Weten se wat," seggt he düll an Joke, "nehmens de Skoe un hauen s´ so gau as mögelk of. Se verdrieven mi mit de Gestank de hele Kundskafft. Ik will hör neet weersehn."

Joke is blied, treckt sien Stefels weer an, nimmt de Skoe un geiht na de Dör. Nett bevör he rut geiht, lett he noch luud een rieten un röppt: "Kunn `k dorvör noch wall ´n Paar Sluren hemmen?"